



Abraham laisse son pays & parentage pour aller en Chanaan, où Dieu luy promet toute benediction.

R le Seigneur dit à Abraham, va t'en hors de la terre, delaisse ton parentage, & la maison de ton pere, & va en la terre que ie te montreray, ce faisant ie te feray croistre en toute benediction, & te promets qu'en toy seront benites toutes les familles de la terre. Abram donc obeissant au Seigneur sortit avec Saray sa femme, & adopta Loth fils de son frere, à cause qu'il n'auoit aucuns enfans, & s'acheminèrent ensemble, & passa iusques en Sichem & iusques en la plaine de Moreth, où le Seigneur apparut, & dit à Abram: Ie donneray cette terre à ta semence, & Abram edifia vn Autel au Seigneur qui luy estoit apparu, & inuoqua son nom: Toutesfois Abram cheminant vers Midy, suruint vne famine en la terre, & Abram descendit en Egypte pour habiter, & en approchant du lieu, dit à sa femme Saray; A cause de ta beauté ie pourrois estre occis des Egyptiens: dis donc que tu es ma sœur, afin que par ton moyen ma vie soit preseruée: Toutesfois la beauté de Saray fut cause qu'elle fut liurée à Pharaon, qui fit du bien à Abram à cause d'elle. Mais le Seigneur ne permit ce forfait, & affligea griefuement Pharaon: A cause de quoy il appella Abram, & luy dit, Que ne m'as tu aduertty que cette-cy estoit ta femme; car ie l'ay presque prise pour estre ma femme. Pharaon donc rendit à Abram Saray, les faisant conduire & tout ce qui leur appartenoit, ou ils voulurent habiter.